

# **Jems Uqa Jaqec Je Oso Anutna Dana Cajaca Jaqiaden Aqunec Je**

Jems i uqa Jisas waliag eu odi fena. Jaqec je i Jems jaqen euna Anutna dana cajaca age kobol me bahic odocnu iwaladec je mati nijina. Uqa dana cajaca age cisdoc meca, doc meca umeig agena je madec eunu cisdu cuhadoqagannu eu cesuladecnu galolo je mati jaqen.

Jems uqa odi gagadic maden. Oso uqa Jisasnu waug meleena uqa gauc cain biliaun. Euqa uqa dana cunug kobol me odadigian. Uqa odi odocobfi uqa waug meleec eu gagadic tawena eunu ihacena.

## *Je Dunuhnu Dado Mec*

1. Feele adec (1.1)
2. Temgec eu ege duuec tawecnu odona (1.2-18)
  - A. Wawaga meleec temdoc (1.2-12)
  - B. Temdoc uqana gug (1.13-18)
3. Ege je dah mimeb toodu ha odoqan (1.19-27)
4. Ege dana cunugnu wawige qoc eu ihocihoc nijiale (2.1-13)
5. Wawige meleecca egena odocca (2.14-26)
6. Ege conige cofdu cuhadoqale (3.1-12)
7. Doc silecca lecis nijesia (3.13-18)
8. Mahanadec kobol eu Anutna cad (dac 4)
  - A. Gonagona mec kobol (4.1-3)
  - B. Dana mahana kobol gawena eu odi dana uqa aideg culdina (4.4)
  - C. Binani sulecnu kobol (4.5-10)

- D. Osonu je me qee madec (4.11-12)
- E. Culaec je madec (4.13-17)
- 9. Dana cehewanagaca age dana leih cilehadegina agenu dahiniga hewec je (5.1-6)
- 10. Age wawaga gagadic mudimeig culumen gahidudu Tibud sumudeiga (5.7-20)
  - A. Age wawaga sosogoei culumen gahidoigale (5.7-11)
  - B. Je cagoc oso cain madowain (5.12)
  - C. Wawaga meleceeb inondoqagan (5.13-18)
  - D. Leih age jic ceja qogina eunu je (5.19-20)

<sup>1</sup> Ija Jems, ija Anutca Jisas Krajs Tibudca alena cabi dana.

Ija Isrel sihil 12-pela age bilisadoc bilegina ageca huga feele aadi maadigina. Age ceeli bileigale adigina.

*Temgec eu ege duuec tawecnu odona*

<sup>2</sup> O cotiel, deweneganu temadec filfil ageca hocobfi age eu ceelecna ceteh himec eigale.

<sup>3</sup> Ceteh oso humei agena wawaga meleec temdocob temdoc eu wooldocobil euna gagadic tatawi culumen gahidoc kobol camasac mudina eu age dogina. <sup>4</sup> Odoc me bahic duman eu age cunugnu ihoc ligiannu, odocob age euna me bahic ititom cobocnu biluqagannu age saen cunug gagadic tataweig culumen gahidoigale.

*Dana uqa cisdoc sileccanu qaqaguldufei uqa gad inondoia*

<sup>5</sup> Anut uqa dana cunug ceteteh adecnu waug nijina, uqa qee gagalena. Eunu age oso uqa cisdoc sileccanu qaqaguldufei uqa Anut eu utigiannu

inondoiale, Anut uqa eu utigian. <sup>6</sup> Euqa dana eu Anut uqa utecnu ihocfo, qeefo odi cain cisdoiaun, uqa waug melecca Anut inondoiale. Dana uqa odi cisdonu eu uqa fufu macas fuludocob qahime i ehi li heli ahu helienawe. <sup>7-8</sup> Dana odi odoc eu uqa cisdoc lecisca. Cisdoc oso Anutnu cisdonu qa cisdoc oso ceteteh mahanadecnu cisdonu. Uqana jic cobocnana cunug luculacaena. Dana odi odoc eu Tibud ceteh oso utigian ec cain cisdoiaun.

### *Dana sawen dana cehewanca*

<sup>9</sup> Cotige uqa cehewanca qee bilina eu uqa ija Anut amegna binanica biligina, isi Anut suli u mitigian imei eunu culaeiale. <sup>10</sup> Euqa cotige cehewanca bilina eu uqa ija Anut amegna binanica qee biligina eunu wawi jogoi cobigina imei eunu culaeiale. Ge, gigi sal qoc qaisenawe odi dana cehewanca uqaha qaisi cal migian. <sup>11</sup> Ge, cam bime i agagca tawime i gigi hoodona, odocob sal qoc tonena. Wele galeca tawen qila eu qee mena eu ege doqona. Eu odiwe dana cehewanca uqa uqana cabi cunug oodi gemona qee migian.

### *Ceteh dana temdocnu uqana je*

<sup>12</sup> Dana uqa gagadic tatawi temdoc cunugna culumen gahidona uqa ceelecca. Uqa temdoc cunug wooldocobfi Anut demico bilec eu utigian. Anut dana cunug uqanu nalug megina eu age ameg i adecnu wele maden. <sup>13</sup> Dana uqa ceteh oso temdocob waug cajenafi eu Anut temteceb wawi cajena ec cain madeiaun. Eu odi qee. Silail uqa Anut temdocwe qee. Odocob Anut dana silail moqagannu qee temadena. <sup>14</sup> Euqa ege cunug abesabes wawige cajeceb euna digena. Egedodoc

egena gale gec me qee eu ninigena. Odime i qisol mecnu ehi li megina. <sup>15</sup> Gale gec me qee kobol eu waugna fagdocob silail mec eu mel basecwe camasac mena. Hibna silail mec eu ben meceb cal mec cali hona.

<sup>16</sup> O cotiel bahic, fefeig age kobol eu culdecebil qauadeiaun. <sup>17</sup> Kobol me ceteteh um igec bagol igec me bahicca eu cunug sao culnadec nena. Fulacdoc cunug memige uqa suladeceb egeca nena. Memige eu uqa uqana kobol qee falicfulucdona. Uqa eu ceteh osona salu camna calena dodolog cecelac mimei haun gohic mena odi qee. <sup>18</sup> Qeeo. Uqa uqadodoc uqana cisdocna gale doc eu toodumei basigen, uqa uqana mele je euna basigen. Ceteteh cunug Anut ifanen euna ege sab magah age casac cabinadec umeig Anutnu ihanegina eu odiwe uqana mel matu bileqannu maden.

*Ege je dah mimeb toodu ha odoqan*

<sup>19-20</sup> O cotiel bahic, age ceteh eunu du cuhadoigale. Age abesabes oso je madeceb docnu waug nijecebfi age mahuc dahiniga ceheigale. Age je madecnufi mahuc fecwe cain madowain. Odocab dana gemag becna Anutna kobol tutuc odoc eu qee odona. Eunu gemanaga ha mahuc cain beiaun. <sup>21</sup> Eunu wawaga cisdoc gegehinc cunug qisol mec kobol cunug geh bahic calena eu age ititacdoigale. Odimeig age jogoi wawaga lal qocna Anutna je wawagana cehen eu oiga. Je eu age dolonoga cahahaadecnu ihoc.

<sup>22</sup> Euqa age je doc dana himec cain biluwain. Age je eu toodu odoc dana bileigale. Age gauc himec dah mifeig eu agedodoc qauadegina. <sup>23</sup> Ge,

dana oso uqa Anutna je gauc himec dah mimi qee toodu odifei eu uqa dana uqadodoc ola dodna fenawe. <sup>24</sup> Uqadodoc ola dodna fimef nui cocobi uqa ola adec eu mahuc bahic dahig celena odiwe. <sup>25</sup> Euqa loo je eu silailna gihacdocnadec besigena eu tutuc bahic. Dana oso uqa loo je eu mecii cuhadudu toodu odifei uqa gauc dah mimei dahig celec dana qee. Anut uqa dana eu uqana odocna eeldugian.

<sup>26</sup> Dana oso uqa odi cisdona, "Ija Anutnu wawi melecca me bahic Anut binan suligina," qa uqadodoc co qee cofdona eu uqadodoc waug qaudona. Eunu uqana waug meleec cuha fecca eu gauc himec. <sup>27</sup> Cuha fec eu ege memige Anut amegna eu soidoc bahic nijeceb odocob gegehinca qee eu odi bilina. Age mel leih anagail memegailca cal mein eundec caja wij cuhanuc bilegina eu ageha culumen gahidocnu cesuladeigale. Ceteh osoha. Maha inadec kobol wawaga gegehin cain qoiaun. Odocob age agena jic coboc cofdu cuhadudu coboiga.

## 2

*Ege dana cunugnu wawige qoc eu ihocihoc nijiale*

<sup>1-4</sup> O cotiel, age egena Tibud Jisas Kraisnu wawaga meleen, uqa Anutna kobolkobol. Dana oso dewegna lotoc me bahicca eben gicna gol saica agena cegulecna hona. Odocob dana sawen oso dewegna lotoc me qeeca uqaha cegulecna hona. Odocob age dana dewegna lotoc me bahicca eu meme mudegina. Odimeig madogina,

“Cois hina bilec me bahic euna hu bilegale,” dogina. Odimeig sawen dana edi madogina, “Hina euna tawaga,” doginafo, qee “Hina jaimina isec hu bilegale,” dogina. Age kobol eu odi odifeig eu agedodoc cotogail agena cisdocna gesiladegina. Age tutuc bahic ihocihoc qee gesiladegina. Age dana lecis eu cisdoc meca qee euna gesiladegina. Eunu age fifi dana ijanca himec cain me mudowain. Odimeig dana ijanca qee eundec cain hibemdownain.

<sup>5</sup> O cotiel bahic, age dah meiga! Dana age dana mahanadec cunug amagana cehewanca qee dana eu age agena wawaga meleec eu cehewanca odiwe biluqagannu Anut wele nesili cedaden. Wele eu uqa je hahun odi maden. Dana uqanu nalug megina eundec eu uqa uqana me culna ehi li madigian. Eunu uqa dana sawen eundec me cul euna biluqagannu wele ehaden. Age Anut huqanehul. <sup>6</sup> Euqa age sawen dana eundec age majanaga hewadein. Age wele dogina, qaig dana eu age age bisah bahic mamadeig culumen gahidu adegina. Eu age himec age gesilec jona madegina. <sup>7</sup> Anut uqa Kraiss ijan me bahic ageca men bilia. Odocob dana eundec age ijan me bahic eu qesaldogina.

<sup>8</sup> Egena king uqa loo je oso maden eu age Anutna jaqec jena jaqein, loo je eu odi madena: “Hina hinanel nalunin maganawe odi hina utuqain bilec\* eundecnu nalug magale,” ena. *(Wok Pris 19.18)*

---

\* **2:8:** Utuqain bilec uqana gug eu odi. Agena loofo, agena kobolfo eu dana osonu nalug magale ec qee madel, cois hina dana eunu nalug magale.

Eunu age mele bahic loo je eu toodu odifeig eu age kobol me bahic odogina. <sup>9</sup> Euqa age dana ijanca oso meme mumudeig dana ijanca qee oso hibemdoginafi eu age silail megina. Eunu loo je eu age aqena eunu age loo je wooldoc dana age tutuc bahic dogina. <sup>10</sup> Ge, dana oso uqa loo je cunug toodudu qa loo je osol himec wooldonafi eu uqa loo je cunug wooldumei silail eu deweg fagdona. <sup>11</sup> Anut uqa odi maden:

“Hina dana cajaca alena sisi jelalec cain wagalagaun,” en. *(Kisim Bek 20.14; Loo 5.18)*

Odocob uqaha odi maden:

“Hina oso qocom cain cal meiaun,” en. *(Kisim Bek 20.13; Loo 5.17)*

Eu ege doqona. Odocob hina dana cajaca alena sisi qee wagalagana qa hina dana oso qocom cal menfi eu hina loo je cunug wooldom. <sup>12</sup> Anut uqa silailna gagadic odoc qatanimei ege besigen hibna uqa egena loo je eu toodu odoc euna gesiligian. Eunu saen cunugna age je madecnuca cel kobol odocnu ha eu loo je eunu ihoc himec odoigale. <sup>13</sup> Dana oso uqa dana hijag osonu qee waloc donafi eu Anut uqa je gesilec deelna ameg wadac dugian. Odocob uqanu ha waloc qee doiaun. Euqa dana uqa dana hijag osonu waloc dona eu uqa gesilec je wooldugian.

*Wawaga meleec tutuc odocca qeefi eu wele cal men*

<sup>14</sup> O cotiel, dana oso uqa ija Kraisnu wawi meleena ec madenafi qa uqa kobol me oso qee odona, dana eu uqana waug meleec eu ceteh gauc himec. Waug meleec eu odi cahahadocnu ihoc

qee. <sup>15</sup> Dana cotigfo, caja cotigfo, uqa lotoc me qee himeccafo, sab jecca qeefo, <sup>16</sup> odocob age oso madugian, “Hina wawin lal qocca bilegale. Hina li lotoc taqimeg dewen walac heia. Odimeg li sab umeg wawin wennu jaga,” dugian. Age eu odi mamadeig qa lotocca deweg cesuldocnu sab qee utifeig je eu himec adi cesuldugian? <sup>17</sup> Eunu wawaga meleec ha eu odi himec. Uqa gauc bibili kobol me oso qee camasac mudinafi eu ceteq gauc himec.

<sup>18</sup> Euqa dana oso uqa madigian, “Oso uqa waug meleecca, oso me odocca,” igian. Eunu ija odi madigina, “Hina wawin meleecca qa me odocca qee adi biligina eu ihactaga figa. Odocob ija ijana wawi meleec ijana me odocna ihachigen,” igina. <sup>19</sup> Hinana wawin meleec eu odi, “Anut osol himec bilina,” agana. Eu hina me bahic. Buga me qee ageha odi wawaga meleena. Odimeig qeleli cucuiegina. <sup>20</sup> Hina dana gad! Hina wawin himec meleena qa me qee odogonafi hina wawin meleec eu ceteq gauc himec eunu hina wawin fogo dugiannu je oso mahecemin dogale. <sup>21</sup> Weleca ege jajanigeil memega Ebrahim uqa melah Aisak ihanec cabalna mudimei Anut ihan-docnu odon. Eunu saen ina Anut uqana odoc fimej dana i ititom ec maden. <sup>22</sup> Eu fagana, uqana waug meleecca uqana me odocca eu ihocihoc len. Odocob uqana me odoc eu uqana waug meleec camasac muden. <sup>23</sup> Odi odonnu Anutna jaqec je tawena eu ihoc len. Jaqec je odi madena: “Ebrahim uqa Anutna jenu waug meleen. Odocob Anut uqa uqana waug meleec fimej dana i ititom ec maden,” ena. *(Genesis 15.6)*



Odocob age Ebrahim uqa Anutna danah oloig.  
<sup>24</sup> Age eu camasac feigale, waug meleec gauc himecna Anut uqa dana eu ititom ec qee madena qa uqa dana me odona eunu uqa dana ititom ec madena.

<sup>25</sup> Eu odi himec wal caja Rehab uqa dana Josua suladeceb hoin eu age cofadime i suladeceb jic filna haun ceselein. Eunu Anut uqa uqana odocnu caja ititom ec maden.

<sup>26</sup> Deweg kisca qeefi wele cal men eu ege doqona. Eu odiwe dana uqa waug meleena qa me odoc qee odona dana eu uqana waug meleec euha cal men.

### 3

#### *Ege conige cofdu cuhadoqale*

<sup>1</sup> O cotiel! Age mati ege dana iwaladec bileqan egina eu cois qee. Ge age dogina, ege dana iwaladoqona Anut uqa ege egena cabinu eu tutucfo, tutuc qeefo gagadic gesilgigian. Euqa iwaladec dana qee uqa uqana cabinu gagadic qee gesildoiaun. <sup>2</sup> Ge, ege cunug cabi oc gaid cahuldoqona. Oso uqa je maadecna qee cahuldona eu uqa dana tutuc bahic, uqa deweg cunug dado mudecnu ha ihoc. <sup>3</sup> Ege hos cona ain qagitoqona. Eunu ege hos hewi iwaldoqannuca, odocob ege eu hewecna hos deweg cunug dado mudeqannuca odi odoqona. <sup>4</sup> Age wag ben ha feigale. Uqa ceteh ben bahic, fufu benben fudocobil nuina. Euqa culum hewec dana eu, wag culum eu ceteh nag bahic, uqa hewi dado mudeceb culum hewec danana cisdoc wag ben eu toodu nuina. <sup>5</sup> Eu

odiwe conige eu dewegna naha nag bahic. Euqa ceteḥ benwe ija didih ena.

Ja nag bahic eu odocob bahu ben eu cunug ja cijenanu ciskoiga! <sup>6</sup> Odocob conige eu ja cinigwe. Conige eu ege dewenige cunug uqana naha bilina. Odimeḥ kobol me qee filfil odocob calena. Eu odocob dewenige cunug gegehini mudina. Eu dewenige cebac bilec cunug ja cijec cinigwe odocob calena, oloqaniḥ uqadodoc ja eu madaadona. <sup>7</sup> Ge, dana age dool cus filfil cunug cedein. Man fululecca man sononecca ceteḥ cunug macasna wana nijegina age dool eu agena gawec cilehduadecebil age dana bisalu himec bilein. Qila ha dana age i edi odocnu ihoc. <sup>8</sup> Euqa dana oso uqa co cilehdocwe qee. Eu gaid qisol je madena. Euha dana qocnu jelec cinigwe. <sup>9</sup> Ege conigena egena Tibud Memigeca qesaldoqona odimeḥ ege dana cotigeil, Anut uqa wican ifani maden eu geladoqona. <sup>10</sup> Qesaldoc jeca geladec je eundecha conige osol euna himec calena. O cotiel! Eu odi cain nijiaunle. <sup>11</sup> Wa tut maha dunuhnadec macasca osoben qee calena. <sup>12</sup> O cotiel, na dan uqa oliw aig qocnu ihoc qee. Na wain uqa dan aig qocwe qee. Odocob eu odiwe macas uqa wa tutca osoben calecnu ihoc qee.

### *Doc silecca eu Anutnadec hona*

<sup>13</sup> Age eundec oso uqa cisdoc silec mecafi uqa uqana coboc menaca uqana cisdoc silecnaca waug jogoecnaca uqana odoc eu me ihacadeiale. <sup>14</sup> Euqa age wawaga dunuhna age dana leihnu heel meginaca cunug agedodoc binanaga sulecnu cisdoginafi age agena docnu cain culaowain,

mele jenu eu uhulec je cain madowain. <sup>15</sup> Doc eundec eu sao ohisnadec qee nena eu mahanadec hona. Eu Anutnadec qee euqa Setennadec. <sup>16</sup> Ge, dana age dana leihnu heel meginaca age agedodoc binanaga sulecnu cisdoginaca dana eu age agena cisdoc eu ihulahal, agena odoc cunug eu qisolca. <sup>17</sup> Euqa cisdoc silec sao ohisdec eu casac soidocca. Odocob eu malolca, gemag jocosaigca. Odocob eunu dana gami wawaga osolna bilegina, age dana leih agena je ihoc todogina. Age wawaga qocca odocob kobol me odogina. Age dana cunugnu kobol me osol eu odadegina. Age qauadec kobol qee odogina. <sup>18</sup> Ege malolca ititom cobifeb i eu ege sab cehoqonawe. Hibna ege malolna ititom coboc eu sab me cinigwe haudoqan.

## 4

### *Dana mahanadec kobol gawena eu uqa Anutnacad*

<sup>1</sup> Age gemona han cadecca gonagona mecca eu cunug anadec hona? Wawaga cajecnu kobol eu ageca bilina. Odi eu age dewenega cunug eu gemona hannu belicanagaca kobol eu himec han cadecca gonagona mecca odocob calena. <sup>2</sup> Age cetetehnu gale adena qa age qee owain. Eunu age qagaadegina. Age cetetehnu amaga qona qa age cedecnu ihoc qee eunu age gonagona mimeig cadegina. Age gale adena eu qee ogina eu eetanu? Age eunu Anut qee sisildogina. <sup>3</sup> Agena cisdoc eu tutuc qee. Odocob ceteteh agedodoc agena belicanagana odoqagannu sisildogina. Eunu saen age sisildogina eu age qee ogina. <sup>4</sup> Age dana

cajaca ocobocobimeig cagogina cinigwe. Dana uqa mahana kobol gawifei uqa Anutnu cad mec kobol odona. Age eunu qee doginafo? Eunu dana uqa mahana kobolnu gawenafi uqa Anutna cad caligian. <sup>5</sup> Anutna jaqec je edi madena, “Kis i Anut ege dunuhna men bilina eu Anut uqa uqadodocnu biligiannu gagadic cahacдона,” ena.\* Age jaqec je i eu gauc himec ec cisdoginafo? <sup>6</sup> Euqa Anut eelgec me geh bahic uum igena. Eunu Anutna jaqec je madena:

“Anut uqa dana ege binanige suli oqan egina eundec hewadeceb nag megina.

Euqa dana wawaga lal qu jogoi cobogina eundec uqa eeladec uum adena,” ena. (*Sindaun 3.34*)

<sup>7</sup> Eunu age lal qu jogoimeig Anut bisalu bileigale. Age Seten feedoigale. Odocob uqa age culadimeibusaligian. <sup>8</sup> Anut cemenug hoiga. Odocob uqa age cemenega hugian. Age silail dana! Ebenega cuseiga. Dana wawaga lecisca age wawaga soidoigale. <sup>9</sup> Age wawaga tucieceb gehca qajeigale. Age qada qajeigale. Dana age qila asalegina eu age asalec culimeig qajeigale. Dana age qila celeboegina age dumanaga culiale. <sup>10</sup> Age Tibud amegna agedodoc lal qu jogoeigale. Age eu odi odifeig Tibud uqa age suladeceb cajoqagan.

### *Ege cotigeilnu um qoc je cain madoqaun*

---

\* **4:5:** Je i edec Buk Baibel cunugna oso qee nijel. Odocob Grik jena gug eu camasac qee. Jems eu ceteh cunug ifanadec saenna kis cebac Anut uqa fuldutocob dana cebac men eunu madenafo (age Jenesi 2.7 feiga, qee uqa Kis Gunnu madenafo ege qee doqona. Uqa Kis Gunnu madenafi uqa cudun ina dih eunu madena.

11 O cotiel, agenu je me qee cain madocob-madocobowain. Dana cotig oso cotignu je me qee madenafi cotig gesildonafi eu uqa loo jenu je me qee madena.† Odocob uqa loo je gesildona. Euqa hina loo je gesildogonafi hina loo je toodu odoc dana qee qa hina loo je gesildoc dana. 12 Eu loo je igec dana osol bilia. Euha gesilgec dana osol bilia. Eu Anut himec. Uqa himec cahahagecnuca fadalgecnuca ihoc. Eunu hina cel dana eu hina utuqain gesildogona?

*Ege Anut cain feedoqaun*

13 Age dana leih edi madegina, “Qilafo, uqadecfo ege taun ben osona belimeb cabi gel osolna ihoc bileqan. Odimeb ege idadimeb meen qaig geh bahic oqan,” egina eu age qila ija dah miteiga. 14 Agenu uqadec eeta oso caligian eu age qee dogina. Age hut cinigwe eu qila himec calimei ficagonawe. 15 Age i edi madoub, “Tibud uqa cois ecebfi ege cebac bilimeb cabi ifo, cabi osofo odeqan,” oub. 16 Ageqa agena me bilec saenna culaec je madegina. Agena culaec je eu me qee bahic. 17 Age cisdu cuhadoiga. Dana kobol me odocnu dona qa uqa qee odona dana eu uqa silail mena.

## 5

*Dana cehewanagaca agenu dahiniga hewec je*

1 Odocob qila age dana caja cehewanagaca eundec age ija dah miteiga! Culumen cunug agenu cali hugian odona eunu age qaqaji bileig gehca

---

† 4:11: Loo je osonu Jems cisdon eu Wok Pris 19.18na nijia eu odi fena. Age Jems 2.8 feiga.

utaeigale. <sup>2</sup> Age cehewanaga eu wele molen. Odocob agena lotoc cumucum ji hedoin. <sup>3</sup> Agena gol silwaca eu tonton cehen. Tonton cehec eu age deweneganu balijeceb agena silail camasac migian. Odocob eu age dewenega ja cinigwe cijadigian. Age cehewanaga ben bahic haudoin eu hib cit qoc saenna agena silail camasac migian. <sup>4</sup> Dana agena cabina cabi ogina eu ameg adecnu cilehdoin eu deweneganu je madena. Cabi dana utaec eu han dana mati bahic age sao ohisna bilegina agena Tibud dahigna ti calen. <sup>5</sup> Age mahana sab ilul qoc ninijen joloig. Age golanaga me qeenu sililec toodu odoloig. Age bulmakauwe qagaadecebil cal moqagannu sab geh bahic jimeig wawaga iben. Eu odiwe age qagaadecebil cal moqagannu deel wele dodoladena. <sup>6</sup> Age dana tutuc coboc eu wele geladimeig qagaadecebil cal mein. Oodogin age qee wadacadelein.

*Age wawaga gagadic mudimeig culumen gahidudu Tibud sumudeiga*

<sup>7</sup> O cotiel, eunu age wawaga gagadic mudimeig culumen cunug gahidodoig leceb Tibud ceseli hugiannu susumudi bileigale. Age dogina, cabi memeg uqa sab aig me bahic qugian imei waug gagadic mudimei wa aqunec hibernaca hugiannu sumudinawe. <sup>8</sup> Tibud hugiannu deel eu onoca qee nijia. Eunu ageha wawaga gagadic mudimeig culumen cunug gahidoigale. <sup>9</sup> O cotiel, Anut age qee gesiladeiaunnu cain gonagona mudecebmudecebowain. Feiga, gesilgec dana uqa jic cebec hibilohu isec taweia. <sup>10</sup> O cotiel, je

hahun madec dana Tibud ijanna madeinnu cisdoigale. Agena cad age me qee mamadegin age wawaga gagadic mudimeig culumen eu gahidoin. Age agena kobol eu fimeig eu toadi odoigale. <sup>11</sup> Age cisdoiga, ege odi madoqona, “Dana age wawaga gagadic mudimeig culumen gahidoin eu age eeldoc oqagan,” oqona. Age Jobna dodo wele dah mein. Uqa waug gagadic mudimeig culumen cunug uqaca hon eu gahidon. Odocob hibna Tibud uqana kobol mena oduden euha age dogina. Tibud uqa e genu waug qocnuca cesulgecnuca eu geh bahic eu mele ege doqona.

*Ege je mele ohis madoqona ec cain madoqaun*

<sup>12</sup> Euqa cotiel, cete h oso meca bahic age odoqagan eu edi. Age sao amegnafo, qee maha amegnafo, cete h oso amegnafo madigina ec eu cain madowain. Age je cagoc oso cain madowain. Age ao e gina eu mele dih nijiale. Age qee e gina eu qee dih nijiale. Eunu Anut geladec ageca qee hoiaun.

*Dana ititom uqana inondoc eu gagadic*

<sup>13</sup> Age eundec oso culumen gahidonafi uqa inondoiale. Oso uqa waug me nijinafi uqa Anut binan sulec due siliale. <sup>14</sup> Age eundec oso uqa hagcafi uqa tamanec uqana cofadec matu utaadeceb hoigale. Age uqanu inondumeig Tibud ijanna mool joudeigale. <sup>15</sup> Odocob age Anutnu wawaga meleeceb inondufeig Tibud uqa hag dana me mudimeig haun tulidugian. Odocob uqa silail leih odonfi Tibud silail eu cunug cagasitugian. <sup>16</sup> Eunu Anut age meadigiannu age agena silail qasalitocobtoobeigale. Odocob euha cotigcotignu inondocobtoobeigale. Dana ititom coboc uqana

inondoc eu gagadicca, eu gagadic odoc odocnu ihoc bahic. <sup>17</sup> Ilaija uqa dana ege cinigwe. Uqa wa cain neiaunnu Anut gagadic inondon. Odocob cabi gel cijed nahaca li wa mahana qee nel. <sup>18</sup> Odocob uqa haun inondon. Odocob sao wa suldocob neceb sab mahana haun wasen.

*Dana oso uqa jic ceja qocobfi ehudi ahoqan*

<sup>19</sup> O cotiel! Cetez oso age doiga. Age eundec oso mele je uqana kobol culecebfi oso ceseli ehudi honafi eu me bahic. <sup>20</sup> In oso silail dana cesuldocob uqa jic me qee culimei Anutca ceseli hona dana eu silail dana uqa cal mecnadec dolog cahahadona. Odocob uqa eu odocna silail mati cagasiadigiannu cabi ona.\*

---

\* **5:20:** Jems uqa cotig Anutna mele je culen eu uqana kobol tutuc mudecnu cisdon, eunu uqa jaqec je i jaqen eu odi fena.



**BAL CEHEC JE HAUN**  
**Genesis and the New Testament in the Amele**  
**language of Papua New Guinea**  
**Buk Stat na Nupela Testamen long tokples Amele long**  
**Niugini**

copyright © 1997 Wycliffe Bible Translators, Inc.

Language: Amele

Contributor: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

1997-01-01

---

PDF generated using Haiola and XeLaTeX on 21 Feb 2024 from source files dated 31 Aug 2023

efcfe8ba-c483-58bb-922c-05455e0b9491